

摘藻堂四庫全書薈要

經部

欽定四庫全書薈要

經部

春秋臣傳卷一至

四

詳校官原任侍講臣王燕緒



欽定四庫全書薈要

春秋臣傳目錄

卷一

隱公

魯臧僖伯

鄭穎考叔

衛石碣

魯衆仲

鄭祭仲

卷二

桓公

魯臧哀伯

隨季梁



楚鬬伯比

晉師服

魯申繻

卷三

莊公一

齊鮑叔牙

齊管敬仲

魯曹劌

魯臧文仲

衛石祈子

齊陳完

卷四

莊公二

晉士為

魯季子

友

楚令尹

子文
子般

周内史過

魯御孫

楚鬻拳

卷五

閔公

齊仲孫湫

晉狐突

晉卜偃

晉史蘇

晉里克

卷六

僖公一

周富辰

虞宮之奇

宋子魚

晉荀息

周內史叔興

鄭叔詹

晉慶鄭

卷七

僖公二

晉子犯

晉趙成子

晉臼季

晉韓簡

晉先軫

晉魏犢

晉呂甥

晉介之推

卷八

僖公三

晉卻缺

成子名缺

衛甯武子

俞

秦子桑

公孫枝

秦孟明

視

楚成得臣

魯公子遂

襄仲

卷九

僖公四

魯展禽

柳下惠

周王孫滿

晉荀林父

中行桓子

晉陽處父

魯公孫敖

卷十

文公

晉范武子

士會

晉韓獻子

厥

魯季文子

季孫行父

晉解楊

魯叔孫得臣

莊叔

晉狐射姑

晉趙盾

趙孟亦曰宣子

宋華元

鄭公子歸生

卷十一

宣公一

魯孟獻子

楚孫叔敖

楚申叔時

鄭子良去疾

衛孫良夫桓子

楚公子嬰齊

楚公子側

卷十二 宣公二

周單襄公靖附子

周劉康公

晉士貞子荀伯

晉卻克

楚潘黨

楚屈巫申公巫臣

晉欒書

卷十三

宣公三

晉知武子

荀瑩

晉伯宗

魯臧宣叔

楚伯州犁

楚養由基

晉趙同

卷十四

成公一

晉范文子

變

晉卻至

楚鍾儀

齊鮑國

齊國佐

魯叔孫僑如

衛孫林父

衛蘧伯玉

卷十五

成公二

晉趙文子

武

曹子臧

楚子囊

晉士匄

范宣子

魯公孫嬰齊

聲伯

晉卻犢

卷十六

成公三

晉魏莊子

絳

晉祁奚

魯叔孫穆子

豹

晉張老

魯臧孫紇

武仲

宋向戌

晉荀偃

中行獻子

卷十七

襄公一

宋子罕

樂喜

周劉定公

夏

晉韓起

宣子

鄭子展

晉士弱

士莊子

魯季孫宿

武子

魯申豐

卷十八

襄公二

鄭子產

吳季子札

晉叔向

羊舌肸

晉師曠

齊晏嬰

平仲

卷十九

襄公三

鄭子太叔

游吉

晉魏舒

獻子

鄭子皮

楚公子午

鄭子羽

公孫揮

鄭然明

駸茂

晉士鞅

范獻子

卷二十

襄公四

晉司馬女叔

衛北宮文子

佗

楚伍舉

楚蘧啓彊

鄭裨竈

魯梓慎

楚屈建

楚然丹

卷二十一

襄公五

楚申無宇

魯子服惠伯

叔

魯榮成伯

衛子鮮

秦公子鍼

晉荀盈

鄭印段

公孫段附

齊州綽

卷二十二

襄公六

衛太叔儀

魯閔馬父

齊陳湏無

子文

晉史趙

齊陳無宇

子桓

鄭良霄

伯有

齊慶封

子家

齊崔杼

卷二十三

昭公一

晉中行穆子

荀吳

魯叔孫昭子

姑

楚左史倚相

觀射父附

魯仲孫釁

卷二十四 昭公二

魯子家懿伯

晉蔡墨

黠

晉籍談

周泠州鳩

秦醫和

緩附

魯季孫意如

平子

卷二十五 昭公三

楚沈尹戌

晉士彌牟

宋樂祁犁

魯仲孫何忌

齊梁丘據

楚囊瓦

子囊孫

卷二十六

昭公四

周單穆公

旗

周劉文公

狄

吳伍子胥

負

楚公子申

子西

楚鬬辛

卷二十七

昭公五

晉趙鞅

簡子

晉荀寅

宋華亥

魯南蒯

魯陽虎

衛齊豹

楚費無極

卷二十八 定公一

楚葉公子高

楚申包胥

衛祝鮀

子魚

鄭駟歆

卷二十九 定公二

魯子路

衛子貢

衛公叔文子

公叔發

齊犁彌

吳大宰嚭

卷三十

哀公

魯冉有

求

魯子服景伯

越大夫種

衛孔圉

文子

魯季孫肥

晉趙無恤

襄子

晉荀瑶

知伯

齊陳武子恒

臣等謹按春秋臣傳三十卷宋王當撰當字

子思眉山山人好學博覽舉進士不第元祐中

蘇轍以賢良方正薦廷對策入四等調龍遊

縣尉蔡京知成都舉為學官不就及京為相

遂不仕卒其書所傳凡一百九十一人各以

贊附于後陳振孫稱為議論純正文詞簡古

于經義多所發明陳造稱為多出新見可與

經傳參贊然持論亦不免有純駁如謂魯哀

公如討陳恒即諸侯可得之類殊非聖人本

意也至其編次時世前後證引國語史記等書補左傳闕畧則誠為該備無遺于經傳有補焉宋史藝文志載是書作五十一卷與此本不合然於當列傳則亦云三十卷蓋志為誤矣乾隆三十九年九月恭校上

總纂官

臣紀昀

臣陸錫熊

臣孫士毅

總

校

官

臣

陸

費

墀

欽定四庫全書薈要卷一千三百五十五

經部

春秋臣傳卷一

宋王當撰

隱公

魯臧僖伯

臧僖伯魯孝公之子公子彊也字子臧五年公將如棠觀魚者僖伯諫曰凡物不足以講大事其材不足以備器用則君不舉焉君將納民於軌物者也故講事以度軌量謂之軌取材以章物采謂之物不軌不物謂之亂

政亂政亟行所以敗也故春蒐夏苗秋獮冬狩皆於農
隙以講事也三年而治兵入而振旅歸而飲至以數軍
實昭文章明貴賤辨等列順少長習威儀也鳥獸之肉
不登於俎皮革齒牙毛羽骨角不登於器則公不射古
之制也若夫山林川澤之實器用之資皂隸之事官司
之守非君所及也公曰吾將略地焉遂往陳魚而觀之
僖伯稱疾不從書曰公矢魚于棠非禮也且言遠地也
冬僖伯卒公曰叔父有憾於寡人寡人弗敢忘葬之加

一等書曰冬十有二月公子彊卒善之也

鄭潁考叔

潁考叔鄭之潁谷封人也初鄭武公娶于申曰武姜生莊公及共叔段莊公寤生驚姜氏故名曰寤生遂惡之愛共叔段欲立之及莊公即位請京使居之謂之京城大叔大叔完聚繕甲兵具卒乘將襲鄭夫人將啓之公命伐京京叛大叔段段入于鄆公伐諸鄆遂寘姜氏于城潁而誓之曰不及黃泉無相見也潁考叔聞之有獻

于公公賜之食食舍肉公問之對曰小人有母皆嘗小人之食未嘗君之羹請以遺之公曰爾有母遺繫我獨無賴考叔曰敢問何謂也公語之故且告之悔對曰君何患焉若闕地及泉隧而相見其誰曰不然公從之公入而賦大隧之中其樂也融融姜出而賦大隧之外其樂也洩洩遂為母子如初君子曰賴考叔純孝也愛其母施及莊公詩曰孝子不匱永錫爾類其是之謂乎十一年鄭伯將伐許公孫闕與賴考叔爭車秋七月庚辰

傳于許考叔取鄭伯之旗蝥弧以先登子都自下射之
鄭師畢登壬午遂入許鄭伯使卒出緞行出犬難以詛
射賴考叔者君子謂鄭莊公失政刑矣政以治民刑以
正邪既無德政又無威刑是以及邪邪而詛之將何益
矣

衛石碣

石碣衛大夫也衛公子州吁嬖人之子也有寵而好兵
公勿禁碣諫曰臣聞愛子教以義方勿納於邪驕奢淫

洙所自邪也四者之來寵祿過也夫寵而不驕驕而能
降降而不憾憾而能矜者鮮矣且夫賤妨貴少陵長遠
間親新間舊小加大淫破義所謂六逆也君義臣行父
慈子孝兄愛弟敬所謂六順也去順效逆所以速禍也
君人者將禍是務去而速之母乃不可乎弗聽其子厚
與州吁遊禁之不可桓公立乃老四年州吁弑桓公而
立未能和其民厚問定君於石子石子曰王覲為可曰
何以得覲曰陳桓公有寵於王陳衛方睦若朝陳使請

必可得也厚從州吁如陳碣使告於陳曰衛國徧小老夫耄矣無能為也此二人者實弑寡君敢即圖之陳人執之而請蒞于衛衛人使殺州吁于濮碣使殺厚于陳君子曰石碣純臣也惡州吁而厚與焉大義滅親其是之謂乎

魯衆仲

衆仲魯大夫也公子益師之子益師孝公子字曰衆父故其子以衆為氏衛州吁立將修先君之怨於鄭而求

寵於諸侯以和其民公問於衆仲曰衛州吁其成乎對
曰臣聞以德和民不聞以亂以亂猶治絲而棼之也夫
州吁阻兵而安忍阻兵無衆安忍無親衆叛親離難以
濟矣夫兵猶火也不戢將自焚也夫州吁弑其君而虐
用其民於是乎不務令德而欲以亂成必不免矣五年
考仲子之宮將萬馬公問羽數於衆仲對曰天子用八
諸侯用六大夫四士二夫舞所以節八音而行八風故
自八以下公從之於是初獻六羽始用六佾也無駭卒

羽父請謚與族公問族於衆仲對曰天子建德因生以賜姓胙之土而命之氏諸侯以字為謚因以為族官有世功則有官族邑亦如之公命以字為展氏

鄭祭仲

祭仲字仲足鄭大夫也始為祭封人因以為氏莊姜愛共叔段請京使居之祭仲曰都城過百雉國之害也先王之制大都不過參國之一中五之一小九之一今京不度非制也君將不堪不如早為之所無使滋蔓蔓難

圖也蔓草猶不可除況君之寵弟乎公曰多行不義必自斃子姑待之既而大叔果敗桓王奪鄭政鄭伯不朝桓五年秋王以諸侯師伐鄭鄭伯禦之設左右拒為魚麗之陳先偏後伍伍承彌縫王卒大敗祝聃射王中肩王亦能軍祝聃請從之公曰君子不欲多上人況敢陵天子乎夜鄭伯使祭足勞王且問左右十一年宋人執祭仲初仲有寵於鄭莊公莊公使為卿為公娶鄧曼生昭公昭公之敗北戎也齊人請昏之昭公辭祭仲曰必

取之君多內寵子無大援將不得立三公子皆君也弗從夏莊公卒故仲立昭公宋莊公誘仲而執之曰不立突將死亦執厲公而求賂焉仲不從其言則君必死國必亡從其言則君可以生易死國可以存易亡少遼緩之則突可故出而忽可故反是不可得則病然後有鄭國古人之有權者祭仲之權是也權者反於經而有善者也權之所設舍死亡無所設行權有道自貶損以行權不害人以行權殺人以自生亡人以自存君子不為

也遂與宋人盟以厲公歸而立之昭公奔衛祭仲專鄭伯患之使其壻雍糾殺之將享諸郊雍姬知之謂其母曰父與夫孰親其母曰人盡夫也父一而已胡可比也遂告仲曰雍氏舍其室而將享子于郊吾惑之以告仲殺雍糾公載以出曰謀及婦人宜其死也十五年厲公出奔蔡六月昭公入十七年高渠彌弑昭公而立公子亶明年秋齊襄公師于首止子亶會之高渠彌相七月戊戌齊人殺子亶而轅高渠彌仲逆昭公弟子儀而立

之是行也仲知之故稱疾不往人曰祭仲以知免仲曰信也

贊曰臧伯之諫賴考叔之感悟於忠孝其庶乎以考叔之純孝而其終以爭斃孝弟犯上者或有之矣莊公之威不能行于其家其能行于國乎考叔之沒哀哉臧伯之後與春秋為終始天之報忠也厚矣祭仲之二三其德易所謂莫益之或擊之惜乎其不輟於齊也公羊稱祭仲古人之有權者異哉伊尹放太甲以覆湯之典刑

也其歸之者以其思庸也祭仲之事果如是乎此乃趨
利以規免何足以語古人之權哉

春秋臣傳卷一

欽定四庫全書薈要卷一千三百五十六

經部

春秋臣傳卷二

宋 王當 撰

桓公

魯臧哀伯

臧哀伯者僖伯之子也名達曰臧孫氏二年四月取郕大鼎于宋戊申納于太廟哀伯諫曰君人者將昭德塞違以臨照百官猶懼或失之故昭令德以示子孫清廟茅屋大路越席大羹不致粢食不鑿昭其儉也衮冕黻

珽帶裳幅舄衡紃紼昭其度也藻率鞞鞶厲游纓
昭其數也火龍黼黻昭其文也五色比象昭其物也錫
鸞和鈴昭其聲也三辰旂旗昭其明也夫德儉而有度
登降有數文物以紀之聲明以發之以臨照百官百官
於是乎戒懼而不敢易紀律今滅德立違而寘其賂器
於太廟以明示百官百官象之其又何誅焉國家之敗
由官邪也官之失德寵賂章也郅鼎在廟章孰甚焉武
王克商遷九鼎于雒邑義士猶或非之而況將昭違亂

之賂器于太廟其若之何公不聽周內史聞之曰臧孫達其有後於魯乎君違不忘諫之以德莊公十一年秋宋大水公使弔焉對曰孤實不敬天降之災以為君憂拜命之辱既而聞之曰公子御說之辭達曰是宜為君有恤民之心臧氏之後世有顯者

隨季梁

季梁隨大夫也六年楚侵隨鬬伯比請羸師以張之熊率且比曰季梁在何益鬬伯比曰以為後圖少師得其

君少師歸請追楚師季梁止之曰天方授楚楚之羸其誘我也君何急焉臣聞小之能敵大也小道大淫所謂道忠於民而信於神也上思利民忠也祝史正辭信也今民餒而君逞欲祝史矯舉以祭臣不知其可也公曰吾牲牷肥腍粢盛豐備何則不信對曰夫民神之主也是以聖王先成民而後致力於神故奉牲以告曰博碩肥腍謂民力之普存也謂其畜之碩大蕃滋也謂其不疾癘蠱也謂其備腍咸有也奉盛以告曰潔粢豐盛謂

其三時不害而民和年豐也奉酒醴以告曰嘉粟旨酒
謂其上下皆有嘉德而無違心也所謂馨香無譏慝也
故務其三時修其五教親其九族以致其禋祀於是乎
民和而神降之福故動則有成今民各有心而鬼神之
主君雖獨豐其何福之有君姑修政而親兄弟之國庶
免於難隨侯懼而修政楚不敢伐

楚鬬伯比

鬬伯比楚大夫也楚將伐隨伯比請羸師以張之隨少

師有寵伯比曰讎有釁不可失也合諸侯以敗之既敗
隨師獲其戎右少師隨及楚平楚子將不許伯比曰天
去其疾矣隨未可克也乃盟而還十三年屈瑕伐羅伯
比送之還謂其御曰莫敖必敗舉趾高心不固矣及羅
大敗莫敖縊于荒谷初屈瑕將盟貳軫鄖人與隨絞州
蓼伐楚師莫敖患之曰盍請濟師於王鬬廉曰師克在
和不在衆商周之不敵君之所聞也莫敖曰卜之對曰
卜以決疑不疑何卜遂敗鄖師于蒲騷

晉師服

師服晉大夫也初晉穆侯之夫人姜氏以條之役生太子命之曰仇其弟以千畝之戰生命之曰成師師服曰異哉君之名子也夫名以制義義以出禮禮以體政政以正民是以政成而民聽易則生亂嘉耦曰妃怨耦曰仇古之命也今君命太子曰仇弟曰成師始兆亂矣惠之二十四年晉始亂故封桓叔于曲沃師服曰吾聞國家之立也本大而末小是以能固故天子建國諸侯立

家鄉置側室大夫有貳宗士有隸子弟庶人工商各有分親皆有等衰是以民服事其上而下無覬覦今晉甸侯也而建國本既弱矣其能久乎卒如其言

魯申繻

申繻魯大夫也六年九月子同生以太子生之禮舉之接以太牢卜士負之士妻食之公與文姜宗婦命之公問名於申繻對曰名有五有信有義有象有假有類以名生為信以德命為義以類命為象取於物為假取於

父為類不以國不以官不以山川不以隱疾不以畜牲
不以器幣周人以諱事神名終將諱之故以國則廢名
以官則廢職以山川則廢主以畜牲則廢祀以器幣則
廢禮晉以僖侯廢司徒宋以武公廢司空先君獻武廢
二山是以大物不可以命公曰是其生也與吾同物命
之曰同十八年春公將有行遂與姜氏如齊孺曰女有
家男有室無相瀆也謂之有禮易此必敗既而果然莊
公十四年傳瑕殺鄭子及其二子而納厲公初內蛇與

外蛇鬪於鄭南門中內蛇死六年而厲公入公聞之問
於申繻曰猶有妖乎對曰人之所忌其氣馘以取之妖
由人興人無釁焉妖不自作人棄常則妖興故有妖
贊曰隨之安危勝敗要於季梁一言之用否賢者之於
國如何也季梁之言其利害灼然可見而隨故用於非
謀甚矣庸人之甘於禍敗也伯比之謀國也忠其料事
也審天以予文昌其後師服之言其見幾也哉

春秋臣傳卷二

欽定四庫全書薈要卷一千三百五十七

經部

春秋臣傳卷三

宋 王當 撰

莊公

齊鮑叔牙

鮑叔牙齊公子小白之傅也齊侯使連稱管至父戍葵丘瓜時而往曰及瓜而代期戍公問不至請代弗許故謀作亂叔牙奉公子小白奔莒亂作管夷吾召忽奉公子糾來奔九年夏公伐齊納子糾桓公自莒先入鮑叔

曰子糾親也請君討之管召仇也請受而甘心焉乃殺子糾召忽死之管仲請囚鮑叔受之及堂阜而稅之先是桓公入自莒使鮑叔為宰辭曰臣君之庸臣也君加惠於臣使不凍餒則是君之賜也若必治國家者則非臣之所能也其唯管夷吾乎臣不若管夷吾者五寬惠柔民弗若也治國家不失其柄弗若也忠信可結於百姓弗若也制禮義可法於四方弗若也執枹鼓於軍門使百姓皆加勇焉弗若也桓公曰夷吾射寡人中鉤是

以濱於死鮑叔對曰夫為其君動也君若宥而反之夫猶是也桓公使請諸魯公曰寡君有不令臣在君之國欲以戮於群臣莊公於是束縛以與齊比至三黜三沐之而位於高國之上叔牙以身下之行以國政號曰仲父桓公遂伯管仲嘗歎曰吾少困窮時嘗與鮑叔賈分財多自與鮑叔不以我為貪知我貧也吾嘗與鮑叔謀而大困窮鮑叔不以我為愚知時有利有不利也吾嘗三仕三見逐於君鮑叔不以我為不肖知我不遭時也

吾嘗三戰三北鮑叔不以我為怯知我有老母也公子
糾敗召忽死之吾幽囚受辱鮑叔不以我為無恥知我
不羞小節而恥名不顯於天下也生我者父母知我者
鮑叔也及夷吾有病桓公問之曰仲父之病病矣可不
諱之至於大病則寡人惡乎屬國而可夷吾曰公欲誰
與桓公曰鮑叔可曰不可其為人潔廉若士也其於不
已若者不比之人一聞人過終身不忘使之理國上且
鈎乎君下且逆乎民其得罪於君將不久矣桓公曰然

則孰可曰勿已則隰朋可其為人也上忘而下不叛愧其不若而哀其不已若者以德分人謂之聖以財分人謂之賢以賢分人未有得人者也以賢下人未有不得人者也其於國有不聞也其於家有不見也勿已則隰朋可此世稱管鮑善交者不得不然也

齊管敬仲

管敬仲名夷吾齊相也初為公子糾之傅桓公殺公子糾而請敬仲於魯比至公親逆之於郊而與之坐而問焉

曰昔吾先君襄公築臺以為高位田狩畢弋不聽國政
卑聖侮士唯女是崇是以國家不日引不月長恐宗廟
之不掃除社稷之不血食敢問為此若何敬仲曰聖王
之治天下也參其國而伍其鄙定民之居成民之事而
謹用六柄焉桓公曰成民之事若何對曰四民者勿使
雜處雜處則其言咙故聖王之處士使就閒燕處工就
官府處商就市井處農就田野少而習焉其心安焉不
見異物而遷焉是故父兄之教不肅而成子弟之學不

勞而能公曰安國若何對曰作內政而寄軍令焉於是制國五家為軌故五人為伍軌長帥之十軌為里故五十人為小戎里有司帥之四里為連故二百人為卒連長帥之十連為鄉故二千人為旅鄉良人帥之五鄉一帥故萬人為一軍五鄉之帥帥之三軍故有中軍之鼓有國子之鼓有高子之鼓春以蒐振旅秋以獮治兵祭祀同福死喪同恤災禍共之夜戰聲相聞足以不乖晝戰目相見足以相識是故守則同固戰則同彊君有此

士也三萬人以方行天下以誅無道以屏周室天下大國之君莫之能禦公曰吾欲從事於諸侯其可乎對曰為游士八十人奉之以軍馬衣裘多其資幣使周遊四方以號召天下之賢士皮幣玩好使民嚮之四方以監其上下之所好擇其淫亂者而先征之閔公元年狄伐邢敬仲言於齊侯曰戎狄豺狼不可厭也諸夏親暱不可棄也宴安酖毒不可懷也詩曰豈不懷歸畏此簡書齊人救邢始霸也僖公四年齊侯以諸侯之師侵蔡蔡

潰遂伐楚楚成王使與師言曰君處北海寡人處南海
唯是風馬牛不相及也不虞君之涉吾地也何故敬仲
對曰昔者召康公命我先君太公曰五侯九伯女實征
之以夾輔周室賜我先君履東至于海西至于河南至
于穆陵北至于無棣爾貢包茅不入王祭不共無以縮
酒寡人是徵昭王南征而不復寡人是問楚子使屈完
及諸侯盟始桓公即位數年東南多有淫亂者一戰敗
三十一國遂南征伐楚荊州諸侯莫不來服北伐山戎

斬孤竹而南歸海濱諸侯莫不來服與諸侯同心勦力
西征攘白狄之地乘桴濟河懸車束馬踰太行與拘夏
服流沙反胙于絳嶽濱諸侯莫不來朝大朝諸侯于陽
穀兵車之屬六乘車之會三甲不解纍兵不解翳弋無
弓服無矢隱武事行文道帥諸侯而朝天子葵丘之會
天子使宰孔致胙於桓公謂伯舅無下拜桓公召管仲
而謀對曰為君不君為臣不臣亂之本也桓公懼出見
客曰天威不遠顔咫尺小白余敢貪天子之命曰爾無

下拜恐墮越于下以為天子羞遂下拜升受命賞服大

輅龍旂九旒渠門赤旂諸侯稱順敬仲之力也襄王以
戎難討王子帶桓公使敬仲平戎于王王以上卿之禮
享敬仲敬仲受下卿之禮而還君子曰管氏之世祀也
宜哉讓不忘其上詩曰愷悌君子神所勞矣敬仲卒五
子皆求立桓公卒易牙豎貂作亂蓋以陽門之扉三月
不葬子路問於孔子曰管仲何如子曰仁也子路曰昔
管仲說襄公公不受是不辨也欲立公子糾而不能是

不知也家殘於齊而無憂色是不慈也桎梏而居檻車
無慙心是無愧也事所射之君是不正也召忽死之管
仲不死是不忠也仁人之道固如是乎孔子曰管仲說
襄公不受公之暗也欲立子糾而不能不遇時也家殘
於齊而無憂色知權命也桎梏而無慙心自裁審也事
所射之君通於變也不死子糾量輕重也夫子糾未成
君管仲裁度於義束縛而立功名未可非也管氏終春
秋而無顯者後有管修者賢為楚大夫白公之亂見殺

魯曹劌

曹劌魯人十年春齊師伐我公將戰劌請見其鄉人曰肉食者謀之又何間焉劌曰肉食者鄙未能遠謀乃入見問何以戰公曰衣食所安弗敢專也必以分人對曰小惠未徧民弗從也公曰犧牲玉帛弗敢加也必以信對曰小信未孚神弗福也公曰小大之獄雖不能察必以情對曰忠之屬也可以一戰戰則請從公與之乘戰于長勺公將鼓之劌曰未可齊人三鼓劌曰可矣齊師

敗績公將馳之蒧曰未可下視其轍登軾而望之曰可
矣遂逐齊師既克公問其故對曰夫戰勇氣也一鼓作
氣再而衰三而竭彼竭我盈故克之夫大國難測也懼
有伏焉吾視其轍亂望其旗靡故逐之十三年公會齊
侯于柯莊公升壇曹子手劒而從之管子進曰君何求
乎曹子曰城壞壓境君不圖與管子曰然則君何求曹
子曰願返汶陽之田管子顧曰君許諾桓公曰諾曹子
請盟桓公下與之盟曹子標劒而去之要盟可犯而桓

公不欺曹子可讎而桓公不怨桓公之信著乎天下自
柯之盟始焉二十三年夏公如齊觀社非禮也劇諫曰
不可夫禮所以整民也故會以訓上下之則制財用之
節朝以正班爵之義帥長幼之序征伐以討其不然諸
侯有王王有巡守以大習之非是君不舉矣土發而社
助時也收擯而烝納要也今齊社而往觀非先王之訓
也天子祀上帝諸侯會之受命焉諸侯祀先公卿大夫
佐之受事焉不聞諸侯之相會祀也祀又不法君舉必

書書而不法後嗣何觀公不聽

魯臧文仲

臧文仲魯大夫臧孫辰也臧哀伯之孫伯氏瓶之子二十八年冬饑文仲言於公曰夫為四鄰之援結諸侯之信申以盟誓固國之艱急是為鑄名器藏寶財固民之殄病是待今國病矣君盍以名器請糴於齊公曰誰使對曰國有饑饉卿出告糴古之制也辰也備卿請如齊公使往從者曰君不命吾子吾子請之其為選事乎文

仲曰賢者急病而讓夷居官者當事不避難在位者恤
民之患是以國家無違今我不如齊非急病也在上不
恤下居官而惰非事君也文仲以鬯圭與玉磬如齊告
糴曰天災流行戾於敝邑敢告滯積以紓執事以救敝
邑豈惟寡君與二三臣實受君賜其周公太公及百辟
神祇實永享而賴之齊人歸其玉而與之糴宋襄公欲
合諸侯文仲曰以欲從人則可以人從欲鮮濟僖二十
一年夏大旱公欲焚巫尪文仲曰非旱備也修城郭貶

食省用務穡勸分此其務也巫尫何為天欲殺之則如
勿生若能為旱焚之滋甚公從之是歲也饑而不害二
十二年公伐邾公卑邾不設備文仲曰國無小不可易
也蠱蠆有毒而況國乎溫之會晉人執衛成公文仲言
於公曰夫諸侯之患諸侯恤之所以訓民也君盍請衛
君以示親諸侯公說乃免衛侯衛侯聞臧文仲之為也
使納賂焉辭曰外臣之言不越境不敢及君三十一年
春取濟西田分曹地使文仲往宿於重館重館人告曰

不速行無及也從之分曹地自洮以南來傳于濟盡曹地也歸為之請曰地之多也重館人之力也臣聞之善有章雖賤必賞也惡有釁雖貴必罰也今一言而辟境其章大矣請賞之乃出而爵之文公二年秋八月丁卯有事于大廟躋僖公逆祀也於是夏父弗忌為宗伯尊僖公且明見曰吾見新鬼大故鬼小先大後小順也躋聖賢明也明順禮也君子以為失禮禮無不順祀國之大事也而逆之可謂禮乎子雖齊聖不先父食久矣故

禹不先鯀湯不先契文武不先不密仲尼曰臧文仲其
不仁者三不知者三下展禽廢六關妾織蒲三不仁也
作虛器縱逆祀祀爰居三不知也五年秋楚滅六又滅
蓼文仲聞六與蓼滅曰皐陶庭堅不祀忽諸德之不建
民之無援哀哉孔子問於漆雕憑曰子事臧文仲武仲
及孺子容此三大夫孰賢對曰臧氏家有守龜名曰蔡
文仲三年而為一兆武仲三年而為二兆孺子容三年
而為三兆憑從此見之若問三人之賢與不賢所不敢

識也孔子曰君子哉漆雕氏之子也其言人之美也隱而顯言人之過也微而著知如不能及明如不能見孰克如此

衛石祈子

石祈子衛大夫也十二年冬猛獲出奔衛宋人請于衛衛人欲勿與祈子曰不可天下之惡一也惡於宋而保於我保之何補得一夫而失一國與惡而棄好非謀也衛人歸之閔公二年狄伐衛衛懿公好鶴鶴有乘軒者

將戰國人受甲者皆曰使鶴鶴實有祿位余焉能戰公
與祈子決與甯莊子矢使守曰以此贊國擇利而為之
與夫人繡衣曰聽於二子及狄人戰衛師敗績遂滅衛
齊桓公封衛于楚丘衛國忘亡文公大布之衣大帛之
冠務材訓農通商惠工敬教勸學授方任能元年革車
三十乘季年乃三百乘

齊陳完

陳完字敬仲陳厲公之子二十二年陳人殺太子禦寇

公子完奔齊齊侯使為卿辭曰羈旅之臣幸若獲宥及
於寬政赦其不閑於教訓而免於罪戾弛於負擔君之
惠也所獲多矣敢辱高位以速官謗請以死辭使為工
正飲桓公酒樂公曰以火繼之辭曰臣卜其晝未卜其
夜君子曰酒以成禮不繼以淫義也以君成禮弗納於
淫仁也初懿氏卜妻敬仲其妻占之曰吉是謂鳳凰于
飛和鳴鏘鏘有媯之後將育于姜陳厲公生敬仲其少
也周史有以周易見陳侯陳侯使筮之曰是謂觀國之

光利用賓于王此其代陳有國乎不在此其在異國非此其身而在其子孫若在異國必姜姓也姜大嶽之後也山嶽則配天物莫能兩大陳衰此其昌乎及陳之亡也陳桓子始大於齊

贊曰管仲辱囚而不死知有鮑叔存焉無鮑叔則無管仲故舉賢之功尚矣管仲相桓公一匡天下身沒未幾而齊大亂豈禮法不身先乎以管仲桓公之賢不能慮陳氏於其始及其成也景公晏子何救哉曹劌閭巷之

人耳而知忠屬可以一戰者先王使民樂為之死唯其誠而已柯之盟公羊以為曹子穀梁以為曹劌考其時事蓋劌也太史以為曹沫其聲之誤邪臧文仲之賢不稱於仲尼而魯人師其言以為死而不朽蓋非立德立功者也立言者也石祈子有碣之風哉

春秋臣傳卷三

欽定四庫全書叢要卷一千三百五十八

經部

春秋臣傳卷四

宋 王當 撰

莊公

晉士蒍

士蒍字子葦晉大夫也劉累之後在周為杜氏宣王殺杜伯杜伯之子陽奔晉生蒍為士故以士為氏初桓莊之族偪獻公患之蒍曰去富子則羣公子可謀也已公曰爾試其事蒍與羣公子謀諸富子而去之明年又與

羣公子謀使殺游氏之二子告晉侯曰不過二年君必無患又明年為使羣公子盡殺游氏之族乃城聚而處之冬晉侯圍聚盡殺羣公子晉侯將伐虢為曰不可虢公驕若驟得勝於我必棄其民無衆而後伐之欲禦我誰與夫禮樂慈愛戰所畜也虢弗畜也亟戰將饑晉侯為太子城曲沃為曰太子不得立矣分之都城而位以卿先為之極又焉得立不如逃之無使罪至為吳泰伯不亦可乎既而太子見殺初晉侯使為為二公子築蒲

與屈不慎寘薪焉夷吾訴之公使讓之為稽首而對曰
臣聞之無喪而感憂必讎焉無戎而城讎必保焉寇讎
之保又何慎焉守官廢命不敬固讎之保不忠失忠與
敬何以事君詩云懷德維寧宗子維城君其修德而固
宗子何城如之三年將尋師焉焉用慎退而賦曰狐裘
尨茸一國三公吾誰適從

魯季子

季子名友魯莊公母弟也謚曰成初季子之將生也桓

公使卜楚丘之父卜之曰男也其名曰友在公之右閒
于兩社為公室輔及生有文在手曰友遂以命之莊公
疾問後於季子對曰臣以死奉般公曰鄉者叔牙謂慶
父材季子曰夫何敢是將為亂乎八月公薨子般即位
共仲使賊子般于黨氏成季奔陳立閔公公使召諸陳
公次于郎以待之書曰季子來歸嘉之也二年八月共
仲使賊公于武闡成季以僖公適邾共仲奔莒季子乃
入立之以賂求共仲于莒莒人歸之及密乃縊僖元年

冬莒人來求賂友敗諸鄆獲莒子之弟棼嘉獲之也十六年三月壬申卒書曰公子季友貴之也

楚令尹子文

令尹子文姓鬬名穀於菟楚大夫也初若敖娶於邲生鬬伯比隨其母畜於邲淫於邲子之女生子文焉邲夫人使棄諸夢中虎乳之邲子田見之遂使收之楚人謂乳穀謂虎於菟故命之曰穀於菟莊之三十年楚人殺子元子文始為令尹自毀其家以紓楚國之難三仕三

已喜慍不形於色成得臣伐陳取焦夷城頓而還子文
以為之功使為令尹叔伯曰子若國何對曰吾以靖國
也夫有大功而無貴仕其人能靖者與有幾僖之二十
七年楚子將圍宋使子文治兵於睽終朝而畢不戮一
人子玉復治兵於蔿終日而畢鞭七人貫三人耳國老
皆賀子文子文飲之酒蔿賈尚幼後至不賀子文問之
對曰不知所賀子之傳政於子玉曰以靖國也靖諸內
而敗諸外所獲幾何子玉之敗子之舉也舉以敗國將

何賀焉子玉剛而無禮不可以治民過三百乘不能以入矣苟入而賀何後之有既而子玉果敗卒子般嗣

般字子揚初子文之兄司馬子良生子越椒子文曰是子也能虎之狀而豺狼之聲弗殺必滅若敖氏矣諺曰狼子野心是乃狼也其可畜乎子良不可子文以為大感及將死聚其族曰椒也知政乃速行矣無及於難且泣曰鬼猶求食若敖氏之鬼不其餒而及子文卒般為令尹子越譖而殺之子越為令尹遂處烝野將攻王楚

莊王與戰于皐澨遂滅若敖氏般之子克黃使於齊還
及宋聞亂其人曰不可入矣克黃曰棄君之命獨誰受
之君天也天可逃乎遂歸復命而自拘於司敗王思子
文之治楚國也曰子文無後何以勸善也使復其所改
命曰生越椒字伯棼文公九年來聘執幣傲叔仲惠伯
知其必滅若敖氏曰傲其先君神弗福也

周内史過

內史過周大夫也三十二年有神降于莘惠王問於過

曰是何故有之乎對曰有之國之將興其君齊明中正
精潔惠和其德足以昭其馨香其惠足以同其人民神
饗而民聽民神無怨故明神降之觀其德政而均布福
焉國之將亡其君貪冒辟邪淫泆荒怠粗穢暴虐其政
腥臊馨香不登其刑矯誣百姓攜貳明神不蠲而民有
遠志民神怨恫無所依懷故神亦往焉觀其苛慝而降
之禍是以或見神以興亦或以亡昔夏之興也祝融降
于崇山其亡也回祿信于聆隧商之興也禱杌次于丕

山其亡也夷羊在牧周之興也鶯鶯鳴于岐山其衰也杜伯射王于鄆是皆明神之志也王曰今是何神也對曰其丹朱之神乎王曰其誰受之對曰在虢土臣聞之道而得神是謂馮福淫而得神是謂貪禍今虢少荒其亡乎王曰吾其若之何對曰以其物享焉王從之使祝史奉犧牲玉鬯往獻過至於虢虢公使史嚱享焉神賜之土田史嚱曰虢其亡乎吾聞之國將興聽於民將亡聽於神神聰明正直而壹者也依人而行虢多涼德其

何土之能得過歸以告王曰虢必亡矣虐而聽於神不
禋於神而求福焉神必禍之不親於民而求用焉民必
違之精意以享禋也慈保庶民親也今虢動匱百姓以
逞其違離民怒神而求利焉不亦難乎僖五年晉滅虢
十一年晉以平鄭之亂來告王召武公及過賜晉侯命
受玉情過歸告王曰晉侯其無後乎王賜之命而情於
受瑞是自棄也其何繼之有禮國之幹也敬禮之興也
不敬則禮不行禮不行則上下昏何以長世夫拜不稽

首誣其王也晉侯誣王人亦誣之大臣享其祿弗諫而阿之亦必及焉十五年惠公隕于韓二十四年秦人殺子金子公

魯御孫

御孫魯大夫也莊公丹桓公之楹刻其桷皆非禮也御孫諫曰儉德之共也侈惡之大也先君有共德而君納諸大惡無乃不可乎二十四年秋哀姜至公使宗婦覲用幣非禮也御孫曰男贄大者玉帛小者禽鳥以章物

也女贄不過榛栗棗脩以告虔也今男女同贄是無別也男女之別國之大節也而由夫人亂之母乃不可乎弗聽閔公哀姜之娣叔姜之子也慶父通於哀姜哀姜欲立之閔公之死哀姜與知之故孫于邾齊桓公取而殺之以其尸歸君子以齊人之殺哀姜也為已甚矣女子從人者也

楚鬻拳


鬻拳楚之閹也初拳強諫楚子楚子不從臨之以兵懼

而從之拳曰吾懼君以兵罪莫大焉遂自刎也楚人以
為大閹謂之大伯使其後掌之君子曰鬻拳可謂愛君
矣諫以自納於刑刑猶不忘納君於善

贊曰士為季友子文之後皆大惟其忠於君利於國而
不為私也季友討公仲其大義滅親者乎經稱公子友
敗莒師獲莒挐穀梁稱友謂挐曰吾二人不相說士卒
何罪屏左右而搏若然豈所謂敗其師乎子文尚子玉
而身下之知其懷而求靖也而不慮屈國喪師之為患

故仲尼謂其忠矣而未仁也魯秉周禮其士大夫皆閑
於先王之典而明得失若衆仲哀伯申繻御孫其多識
君子哉異哉鬻拳之愛君也有愛君之誠而不知愛君
之道豈忠勇而未始學邪

春秋臣傳卷四



覆校官編修臣朱依魯

校對官編修臣李光雲

謄錄監生臣趙興吾

欽定四庫全書薈要

經部

春秋臣傳卷十五至



欽定四庫全書薈要卷一千三百五十九


經部

春秋臣傳卷五

宋 王當 撰

閔公

齊仲孫湫

仲孫湫齊大夫也魯共仲之亂湫以事出疆因來省難故書曰仲孫來曰仲孫嘉之也公曰魯可取乎對曰猶秉周禮周禮所以本也臣聞之國將亡本必先顛而後枝葉從之魯不棄周禮未可動也君其務寧魯難而親

之親有禮因重固間攜貳覆昏亂霸王之器也

晉狐突

狐突字伯行晉公子重耳外祖父也二年十二月晉侯使太子申生伐東山臯落氏公衣之偏衣佩之金玦突曰時事之徵也衣身之章也佩衷之旗也故敬其事則命以始服其身則衣之純用其衷則佩之度今命以時卒閱其事也衣之龙服遠其躬也佩以金玦棄其衷也服以遠之時以閱之龙涼冬殺金寒玦離胡可恃也梁

餘子養曰帥師者受命於廟受脤於社有常服矣不獲而
尤命可知也死而不孝不如逃之太子敗狄而反讒言益
起卒縊而死重耳夷吾出奔僖十年晉侯改葬共太子突
適下國遇太子太子使登僕而告之曰夷吾無禮余得請
於帝矣將以晉畀秦秦將祀余對曰臣聞之神不歆非類
民不祀非族君祀無乃殄乎且民何罪失刑乏祀君其圖
之君曰諾吾將復請七日新城西偏將有巫者而見我焉
及期而往告之曰帝許我罰有罪矣敝於韓十五年秦敗

晉師于韓獲晉惠公夷吾及惠公卒懷公命無從亡人期期而不至無赦突之子毛及偃從重耳在秦弗召冬懷公執突曰子來則免對曰子之能仕父教之忠古之制也策名委質貳乃辟也今臣之子名在重耳有年數矣若又召之教之貳也父教子貳何以事君刑之不濫君之明也臣之願也淫刑以逞誰則無罪臣聞命矣乃殺之卜偃稱疾不出曰周書有之乃大明服已則不明而殺人以逞不亦難乎民不見德惟戮是聞其何後之有明年晉人殺懷公

晉卜偃

卜偃晉大夫也亦曰郭偃晉侯賜畢萬魏以為大夫偃曰畢萬之後必大萬盈數也魏大名也以是始賞天啓之矣天子曰兆民諸侯曰萬民今名之大以從盈數其必得衆虢公敗戎于桑田偃曰虢必亡矣亡下陽不懼而又有功是天奪之鑒而益其疾也不可以五稔冬十一月晉滅虢二十五年春秦伯師于河上欲納王狐偃請文公勤王使偃卜遇黃帝戰于阪泉之兆公曰不堪

也對曰周禮未改今之王古之帝也晉侯辭秦師而下
三月右師圍溫左師逆王四月入于王城敗太叔于溫
殺之戊午晉侯朝王王享醴命之宥文公問於偃曰始
吾以治為易今也難對曰君以為易其難也將至矣君
以為難其易也將至焉聽童謠占柩音

不錄

晉史蘇

史蘇晉卜大夫也獻公卜伐驪戎蘇占之曰勝而不吉
且懼有口公曰口在寡人寡人弗受誰敢興之對曰苟

可以攜其入也必甘受逞而不知胡可壅也公弗聽遂
伐驪克之獲驪姬以歸有寵立以為夫人蘇告晉大夫
曰有男戎必有女戎若晉以男戎勝戎而戎亦以女戎
勝普里克曰何如對曰昔夏桀伐有施有施氏以妹喜
女焉妹喜有寵於是乎與伊尹比而亡夏商辛伐有蘇
有蘇氏以妲己女焉妲己有寵於是乎與膠鬲比而亡
商周幽王伐有褒褒人以褒姒女焉褒姒有寵生伯服
於是乎與虢石父比逐太子宜臼而立伯服太子奔申

申人召西戎以伐周周於是乎亡今晉寡德而安俘女
又增其寵雖當三季之王不亦可乎從政者不可以不
戒亡無日矣驪姬生奚齊其娣生卓子驪姬請使申生
主曲沃重耳處蒲夷吾處屈奚齊處絳以儆無備之故
公許之蘇朝告大夫曰二三大夫其戒之乎亂本生矣
驪姬果作難殺太子而逐二公子君子曰知亂本矣初
獻公筮嫁伯姬于秦遇歸妹之睽蘇占之曰不吉及惠
公敗于韓卒如其言語見韓簡

晉里克

里克晉大夫也為太子申生之傅公將黜申生而立奚齊里克曰史蘇之言將及矣其若之何平鄭曰吾聞從事者從其義不阿其惑克曰我不佞雖不識善亦不阿惑吾其靜也晉侯使申生伐東山臯落氏克諫曰太子奉冢祀社稷之粢盛以朝夕視君膳者也故曰冢子君行則守有守則從從曰撫軍守曰監國古之制也夫師在制命而已稟命則不威專命則不孝故君之嗣適不

可以帥師公曰立太子之道有三身鈞以年年同以愛
愛疑決以卜筮子無謀吾父子之間不對而退見太子
太子曰吾其廢乎對曰子懼不孝無懼不得立修己而
不責人則免於難孺子勉之乎君子曰善處父子之間
矣驪姬告優施曰君既許我殺太子而立奚齊吾難里
克若何優施曰子為我具特羊之饗吾以從之飲姬許
諾施飲里克酒告克曰君既許驪姬殺太子而立奚齊
謀既成矣克曰中立其免乎優施曰免克告平鄭曰吾

不敢撓志以從君而廢人以自利也明日稱疾不朝三旬難成驪姬以君命命申生曰今夕君夢齊姜必速祠而歸福太子祭于曲沃歸胙于絳公至自田姬毒而獻之公祭之地地墳與犬犬斃與小臣小臣亦斃申生恐而出奔新城或謂太子子辭君必辯焉太子曰君非姬氏居不安食不甘我辭姬必有罪君老矣吾又不樂曰子其行乎太子曰君實不察其罪被此名也以出人誰納我十二月戊申自經于廟九年獻公卒克欲納文公

故以三公子之徒作亂十月殺奚齊及驪姬書曰殺其君之子未葬也荀息立公子卓而葬十一月克殺公子卓于朝荀息死之書曰里克弒其君卓及其大夫荀息正其罪也克使告夷吾于梁會周公忌父立晉惠公惠公殺克以說將殺克使謂之曰微子則不及此雖然子弒二君與一大夫為子君者不亦難乎對曰不有廢也君何以興欲加之罪其無辭乎臣聞命矣伏劒而死既而悔之書曰晉殺其大夫里克克親為三怨之主累弒

二君故稱名誅之也

贊曰春秋之士死生存亡禍福一以禮觀之仲孫湫之言得其本矣公羊以仲孫為慶父非也慶父實與弑子般其來不竟魯失刑矣又安得而美之晉執狐突使召毛偃而不從楚囚伍奢使召尚貞而從之蓋毛偃重耳之臣雖父命有所不行也卜偃之見微有足尚者史蘇之智亦其亞也古之君子晦於卜筮者多矣里克始非不善乃臨危輒變首鼠兩端進退無所據竟亦不免豈

若荀息守志以成名知死非難處死為難信哉

春秋臣傳卷五

欽定四庫全書薈要卷一千三百六

經部

春秋臣傳卷六

宋 王當 撰

僖公

周富辰

富辰周大夫也二十四年鄭伐滑王使伯服游孫伯如鄭請滑鄭伯怨惠王之入不與厲公爵也又怨襄王之與衛滑也故不聽王命而執二子王怒將以狄伐鄭辰諫曰不可臣聞之太上以德撫民其次親親以相及也

昔周公弔二叔之不咸故封建親戚以藩屏周管蔡郕霍魯衛毛聃郇雍曹滕畢原酆郇文之昭也邶晉應韓武之穆也召穆公思周德之不類故糾合宗族于成周而作詩曰常棣之華鄂不韡韡凡今之人莫如兄弟其四章曰兄弟閱于牆外禦其侮如是則兄弟雖有小忿不廢懿親今天子不忍小忿以棄鄭親其若之何庸勲親親暱近尊賢德之大者也即聾從昧與頑用嚚姦之大者也鄭有平惠之勲又有厲宣之親棄嬖寵而用三

良於諸姬為近四德具矣耳不聽五聲之和為聾目不別五色之章為昧心不則德義之經為頑口不道忠信之言為嚚狄皆則之四姦具矣夫兄弟之怨不懲於他王其不可棄之王弗聽使頹叔桃子出狄師伐鄭王德狄人將以其女為后展諫曰不可臣聞之報者倦矣施者未厭狄固貪恠王又啓之女德無極婦怨無終狄必為患又弗聽初甘昭公通於隗氏王替隗氏頹叔桃子曰我實使狄狄其怨我乎遂奉太叔以狄師攻王大敗

周師獲辰王出適鄭太叔居于溫辰乃以其屬死之

虞宮之奇

宮之奇虞大夫也晉荀息請假道於虞以伐虢公曰宮之奇存焉對曰宮之奇之為人也懦而不能強諫且少長於君君暱之雖諫將不聽且夫翫好在耳目之前而患在一世之後中智以上乃能慮之臣料虞公中智以下也乃使荀息假道於虞虞公許之之奇諫曰晉國之使其辭卑而幣重乃不便於虞虞公弗聽荀息里克帥

師會虞師滅下陽五年晉侯復假道於虞以伐虢之奇

諫曰虢虞之表也虢亡虞必從之晉不可啓寇不可翫
一之謂甚其可再乎諺所謂輔車相依唇亡齒寒者其
虞虢之謂也公曰晉吾宗也豈害我哉對曰太伯虞仲
太王之昭也太伯不從是以不嗣虢仲虢叔王季之穆
也為文王卿士勲在王室藏之盟府將虢是滅何愛於
虞公曰吾享祀豐潔神必據我對曰臣聞之鬼神非人
實親惟德是依非德民弗和神弗享矣神所馮依將在

德矣若晉取虞而明德以薦馨香神其吐之乎弗聽之
竒出曰虞將亡矣吾不去懼及焉以其族行曰虞不臘
矣在此行也晉不再舉矣十二月滅虢師還館於虞遂
襲虞滅之執虞公故書曰晉人執虞公罪虞且言易也

宋司馬子魚

司馬子魚宋公子目夷也宋桓公疾大子茲父固請曰
目夷長且仁君其立之公命子魚子魚曰能以國讓仁
孰甚焉臣不及也且又不順遂走而退宋襄公即位以

公子目夷為仁使為左師以聽政於是宋治故魚氏世為左師十九年宋人執滕宣公夏公使邾文公用鄆子于次睢之社欲以屬東夷子魚曰古者六畜不相為用小事不用大牲而況敢用人乎祭祀以為人民神之主也用人其誰饗之齊桓公存三亡國以屬諸侯義士猶曰薄德今一會而虐二國之君又用諸淫昏之鬼將以求霸不亦難乎得死為幸秋宋人圍曹討不服也子魚言於宋公曰文王聞崇亂而伐之軍三旬而不降退修

教而復伐之因壘而降詩曰刑于寡妻至于兄弟以御
于家邦今君德無乃猶有所闕而以伐人若之何盍姑
內省德乎無闕而後動二十一年秋諸侯會宋公于孟
子魚曰禍在此乎君欲已甚其何以堪之於是楚執宋
公以伐宋始宋公與楚子期以乘車之會目夷諫曰楚
夷國也彊而無義請以兵車之會往宋公曰不可吾與
約以乘車之會自我為之自我隳之不可終以乘車往
楚人果伏兵車執宋公以伐宋楚知雖殺宋公猶不可

得宋國於是釋宋公公走之衛子魚曰國為君守之君
曷為不入然後逆襄公歸明年三月鄭伯如楚夏宋公
伐鄭子魚曰所謂禍在此矣楚人伐宋以救鄭十一月
己巳朔宋公及楚人戰于泓宋人既成列楚人未既濟
子魚曰彼衆我寡及其未既濟也請擊之公曰不可既
濟而未成列又以告公曰未可既陳而後擊之宋師敗
績國人皆咎公公曰君子不重傷不禽二毛古之為軍
也不以阻隘也寡人雖亡國之餘不鼓不成列子魚曰

君未知戰勅敵之人隘而不列天贊我也阻而鼓之不
亦可乎若愛重傷則如勿傷愛其二毛則如服焉三軍
以利用也金鼓以聲氣也利而用之阻隘可也聲盛致
志鼓儵可也二十三年襄公卒傷於泓故也

晉荀息

荀息字叔晉大夫也獻公朝諸大夫而問焉寡人夜者
寢而不寐其意何也諸大夫有進對者曰寢不安與其
諸侍御有不在側者與獻公不應荀息進曰虞虢見與

獻公揖而進之遂與之謀息請以屈產之乘與垂棘之璧假道於虞以伐虢公曰是吾寶也對曰若得道於虞是我取之中府而藏諸外府也取之中廡而置之外廡也公曰宮之奇存焉對曰宮之奇之為人也達心而懦達心則其言略懦則不能強諫則君輕之且夫翫好在耳目之前而患在一世之後此中智以上乃能慮之臣料虞公中智以下也乃使息假道虞公許之夏荀息帥師會虞師伐虢滅下陽先書虞賄故也五年復滅虢而

滅虞息牽馬操壁而前公曰壁則猶是也而馬齒加長
矣獻公使息傳奚齊公疾使召之曰以是藐諸孤辱在
大夫其若之何稽首而對曰臣竭其股肱之力加之以
忠貞其濟君之靈也不濟則以死繼之公曰何謂忠貞
對曰公家之利知無不為忠也送往事居耦俱無猜貞
也及里克將殺奚齊告息曰子將何如曰將死之里克
曰無益也荀息曰吾與先君言矣不可以貳能欲復言
而愛身乎雖無益也將焉辟之九年十月里克殺奚齊

于次息將死之人曰不如立卓子而輔之息立公子卓以葬十一月里克殺卓子於朝息死之君子曰詩所謂白圭之玷尚可磨也斯言之玷不可為也荀息有焉

周内史叔興

事襄王

內史叔興周大夫也十六年隕石于宋五隕星也六鷁退飛過宋都風也叔興聘于宋宋襄公問焉曰是何祥也吉凶焉在曰今茲魯多大喪明年齊有亂君將得諸侯而不終退而告人曰君失問是陰陽之事非吉凶所

生也吉凶由人吾不敢逆君故也二十八年晉文公獻
楚俘于王王享醴命晉侯宥王命叔興策命晉侯為侯
伯賜之大路之服戎路之服彤弓一彤矢百玃弓矢千
秬鬯一卣虎賁三百人曰王謂叔父敬服王命以綏四
國糾逖王慝晉侯三辭從命曰重耳敢再拜稽首奉揚
天子之休命受策以出出入三覲叔興告王曰晉不可
不善也其君必霸不逆王命敬奉禮義王其善之王從
之使於晉者道相逮也及惠后之難王出在鄭晉侯納

之

鄭叔詹

叔詹鄭伯之弟也齊桓公會于甯母管仲曰鄭有叔詹堵叔師叔三良為政未可間也宋伐鄭楚成王救鄭敗宋公于泓鄭文夫人芊氏姜氏勞楚子于柯澤楚子使師縉示之俘馘君子曰非禮也婦人送迎不出門見兄弟不踰閭戎事不邁女器丁丑楚子入享于鄭夜出文芊送于軍取鄭二姬以歸叔詹曰楚王其不沒乎為禮

卒於無別將何以沒諸侯是以知其不遂霸也晉公子重耳出奔及鄭文公不禮焉叔詹諫曰臣聞之天之所啓人弗及也天其或者將建諸君其禮焉弗聽叔詹曰若不禮焉則請殺之公又弗聽及晉文公即位伐鄭鄭人以名寶行成晉不許曰予我詹而師退詹請往鄭伯弗許詹固請曰一臣可以赦百姓定社稷君何愛於臣也鄭人以詹予晉晉人將烹之叔詹曰殺身贖國忠也乃就烹據鼎耳而疾號曰自今以往知忠以事君者與

詹同乃命勿殺厚為之禮而歸之

晉慶鄭

慶鄭晉大夫也秦饑使乞糴於晉晉人弗與鄭曰背施
無親幸災不仁貪愛不祥怒鄰不義四德皆失何以守
國虢射父曰皮之不存毛將安傅弗聽初晉饑秦輸之
粟秦饑晉閉之糴十五年秦伯伐晉晉惠公謂鄭曰寇
深矣若之何對曰君實深之可若何公曰不孫卜右鄭
吉弗使戰乘小駟鄭入也鄭曰古者大事必乘其產生

其水土知其人心安其教訓而服習其道唯所納之無
不如志今乘異產以從戎事及懼而變將與人易亂氣
狡憤陰血周作張脉僨興外彊中乾進退不可周旋不
能君必悔之不聽九月戰于韓原晉戎馬還潯而止秦
伯獲晉侯以歸及秦伯歸晉侯蛾析謂鄭曰盍行乎對
曰臣而不臣行將焉入十一月晉侯歸殺鄭而後入
贊曰富辰不憾復諫而能殺身以為君可謂仁矣親親
仁也斯固富辰之所能為也宮之奇諫非不善也而其

言以暱廢孔子曰事君數斯辱矣宋襄公用鄆子于社
無人道矣而欲以仁義之戰屬諸侯此詩所謂志大心
勞求之者非道惜乎子魚之不為國也公羊謂文王之
戰不過此文王唯不喜脯醢諸侯所以能征諸侯也孔
子曰信近於義言可復也獻公以奚齊託荀息荀息以
義折之亂庶乎沮不知出此區區以復言為信此與尾
生何異周内史博聞明識每有其人豈習於先王之典
邪丘明以晉文公不殺叔詹史以謂殺之傳之誤也以

文公之不殺寺人披知其必賢於詹也

春秋臣傳卷六

欽定四庫全書薈要卷一千三百六十一

經部

春秋臣傳卷七

宋 王當 撰

僖公

晉子犯

名狐偃

子犯名偃狐突之子也文公之舅又曰舅犯為晉卿初公子重耳奔狄從者狐偃趙衰顓頊魏武子司空季子里克殺奚齊卓子使屠岸夷告重耳曰國亂民擾得國在亂治民在擾子盍入乎吾請為子鉅重耳告舅犯對

曰不可夫長國者唯知喜怒哀樂之節以導民今不哀
喪而乘國難因亂以入不哀喪是必樂喪樂喪則哀生
因亂以入則必喜亂喜亂則必怠德是喜怒哀樂之節
易也何以導民重耳出見使者辭焉秦穆公乃使公子
絳弔曰寡人聞之得國常於喪失國常於喪公子其圖
之重耳告舅犯對曰不可父死不得與於哭泣之位其
敢有他志以辱君義穆公乃先置公子夷吾過衛衛文
公不禮焉出於五鹿乞食於野人野人與之塊公子怒

欲鞭之子犯曰天賜也稽首受而載之及齊齊桓公妻之公子安之姜曰行也懷與安實敗名先王安安而能遷與子犯謀醉而遣之過宋公孫固言於襄公曰晉公子亡長幼矣而好善不厭父事狐偃師事趙衰而長事賈佗狐偃其舅也而慧以有謀趙衰夙之弟也而文以忠貞賈佗公族也而多識以恭敬此三人者實左右之公子居則下之動則咨焉成幼而不倦殆有禮矣樹於有禮必有艾襄公從之贈以馬二十乘過楚楚子玉請

殺之戒王請止偃王曰不可於是懷公自秦逃歸秦伯
召公子於楚二十四年秦伯納文公及河子犯以璧授
公子曰臣負羈紲從君巡於天下臣之罪甚多矣請由
此亡公子曰所不與舅氏同心者有如白水投其璧于
河二月辛丑偃及秦晉之大夫盟于郇壬寅公子入二
十五年秦伯師于河上將納王偃言於晉侯曰求諸侯
莫如勤王諸侯信之且大義也繼文之業而信宣於諸
侯今為可矣晉侯辭秦師而下以師迎王王入于王城

與之陽樊溫原攢茅之田晉於是始啓南陽晉侯始入而教其民二年欲用之子犯曰民未知義未安其居於是出定襄王以示之義入務利民民懷生矣將用之子犯曰民未知信未宣其用於是伐原以示之信公曰可矣子犯曰民未知禮未生其恭於是大蒐以示之禮作執秩以正其官民聽不惑而後用之出穀成釋宋圍一戰而霸文之教也晉侯侵曹又伐衛楚救曹衛子玉從晉師晉師退軍吏曰以君辟臣辱也且楚師老矣何故

退子犯曰師直為壯曲為老豈在久乎微楚之惠不及此退三舍辟之所以報也背惠食言以亢其讎我曲楚直其衆素飽不可謂老我退而楚還我將何求若其不還君退臣犯曲在彼矣退三舍楚衆欲止子玉不可四月戊辰晉侯次于城濮大敗楚師

晉趙成子

趙成子名衰字子餘晉卿也耿大夫之弟也初從公子重耳如秦子餘曰欲人之愛己也必先愛人欲人之從

已也必先從人云云秦伯享公子如饗國君之禮子餘相如賓卒事秦伯謂其大夫曰為禮而不中恥也中不勝貌恥也華而不實恥也不度而施恥也施而不濟恥也恥門不閉不可以封非此用師則無所矣二三子敬乎明日燕公賦采芣子餘使公子賦黍苗子餘曰重耳之仰君猶黍苗之仰陰雨也若君實庇蔭膏澤之使能嘉穀薦在宗廟君之力也晉侯圍原命三日之糧原不降命去之謀出曰原將降矣軍吏曰請待之公曰信國

之寶也民之所庇也得原失信何以庇之所亡滋多矣
退一舍而原降使衰為原大夫晉侯問原守於寺人勃
鞮曰昔趙衰以壺飧從徑餒而弗食故使處原二十七
年蒐于被廬作三軍謀元帥衰曰卻縠可臣亟聞其言
矣說禮樂而敦詩書詩書義之府也禮樂德之則也德
義利之本也乃使卻縠將中軍命衰為上卿辭曰三德
者偃之出也以德紀民其章大矣不可廢也使狐偃辭
曰毛之智賢於臣又齒長乃使狐毛將上軍狐偃佐之

又使衰為下卿辭曰欒枝正慎先軫有謀胥臣多聞皆可以為輔佐臣弗若也乃使欒枝將下軍胥臣佐之卻縠卒先軫代之狐毛卒復使衰代之辭曰城濮之戰先且居之佐軍也善乃使先且居將上軍公曰趙衰三遜社稷之衛也廢遜是廢德也

晉曰季

名胥臣

曰季晉大夫胥臣也亦曰司空季子文公之奔曰季從焉適秦秦伯歸女五人懷嬴與焉公子使奉匜沃盥既

而揮之怒曰秦晉匹也何以卑我公子懼欲辭司空季子曰同姓為兄弟黃帝之子二十五人其同姓者二人而已唯青陽與夷鼓為己姓青陽方雷氏之甥也夷鼓彤魚氏之甥也其同生而異姓者四母之別為十二姓凡黃帝之子二十五宗其得姓者十四為十二姓姬酉祈已滕箴任荀僖姁僂依是也唯青陽與蒼林氏同于黃帝故皆為姬姓同德之難如是故少典娶于有蟜氏生黃帝炎帝黃帝以姬水成炎帝以姜火成成而異德

故黃帝為姬炎帝為姜二帝用師以相濟也異德之故也異姓男女相及以生民也同姓畏黷黷則生怨故娶妻避其同姓今子與子圉道路之人也取其所棄以濟大事不亦可乎乃歸女而納幣且逆之文公學讀書於臼季三日曰吾不能行也咫聞則多矣對曰然多聞以待能者不猶愈也文公問於胥臣曰吾欲陽處父傳謹也而教誨之其能善之乎對曰是在謹也蘧蒢不可使俯戚施不可使仰僬僂不可使舉侏儒不可使援矇瞽

不可使視嚚瘖不可使言聾聵不可使聽童昏不可使
謀質將善而賢良贊之則濟可竣臣聞昔者大任娠文
王不加病焉文王在母不憂在傅不勤處師不煩事王
不怒孝友二號而慈惠二蔡刑于太姒比于兄弟及其
即位也詢于八虞而咨于二虢度于閼天而謀于南宮
諏于蔡原而訪于辛尹重以周召畢榮億寧百神而和
柔萬民非專教誨之力也公曰奈夫八疾何對曰官師
之所材也戚施直鑄蘧蒢蒙璆侏儒扶盧矇瞍修聾聵

聵司火童昏嚚瘖僂官師之所不材也以實裔土夫
教者因體能質而利之者也三十三年晉侯敗狄于箕
郤缺獲白狄子初臼季過冀見冀缺耨其妻饁之敬相
待如賓與之歸言諸文公曰敬德之聚也能敬必有德
德以洽民君請用之臣聞出門如賓承事如祭仁之則
也公曰其父有罪可乎對曰舜之罪也殛鯀其舉也興
禹管敬仲桓之賊也實相以濟文公以為下軍大夫反
自箕襄公以再命命先茅之縣賞胥臣曰舉郤缺子之

功也以一命命卻缺為卿復與之冀文公五年胥臣卒

晉韓簡

韓簡晉大夫也韓萬之孫曲沃桓叔生萬萬受韓為大夫故曰韓氏初晉獻公筮嫁伯姬於秦史蘇占之曰不吉及惠公在秦曰先君若從史蘇之占吾不及此夫簡侍曰龜象也筮數也物生而後有象象而後有滋滋而後有數先君之敗德及可數乎史蘇是占勿從何益

晉先軫

先軫晉卿也邑于原又曰原軫秦師襲鄭軫曰秦違蹇叔而以貪勤民天奉我也奉不可失敵不可縱縱敵患生違天不祥一日縱敵數世之患也遂發命遽興姜戎子墨衰經敗秦師于殽獲孟明視西乞術白乙丙以歸文嬴請三帥曰彼實搆吾二君寡君若得而食之不厭使歸就戮于秦若何公許之先軫朝問秦囚公曰夫人請之吾舍之矣軫怒曰武夫力而拘諸原婦人暫而免諸國墮軍實而長寇讎亡無日矣不顧而唾公使陽處

父追之不及狄伐晉軫曰匹夫逞志於君而無討敢不自討乎免胄入狄師死焉狄人歸其元面如生

晉魏犢武子

魏犢晉大夫也是為魏武子祖曰畢萬公子重耳之奔狄武子從焉晉文公及曹僖負羈言於曹伯曰晉公子在此君之匹也不亦禮乎臣聞之禮賓於窮禮之宗也禮以紀政國之常也失常不立君所知也玉帛酒食猶糞土也愛糞土以毀三常無乃不可乎公不聽曹共公

聞其駢脅欲觀其裸浴僖負羈之妻曰吾觀晉公子之從者皆足以相國若反其國必得志於諸侯而誅無禮曹其首也子盍早自貳焉乃饋盤飧寘璧焉公子受飧反璧二十八年二月晉侯圍曹三月入曹令無入僖負羈之宮而免其族報施也魏犢顛頡怒曰勞之不圖報於何有遂襲僖負羈氏晉侯怒欲殺犢而愛其材乃舍之殺顛頡以徇于師城濮之戰晉中軍風于澤亡大旆之左旃祁瞞奸命司馬殺之以徇于諸侯師還濟河舟

之僑先歸秋七月振旅愷以入殺之僑以徇于國民於是
是大服君子謂文公其能刑矣三罪而民服驪子顓事
晉景公宣公十五年秦桓公伐晉次輔氏獲杜回秦之
力人也初武子有嬖妾無子武子疾命顓曰必嫁是疾
病則曰必以為徇及卒顓嫁之曰疾病則亂吾從其治
也及輔氏之役顓見老人結草以亢杜回躋故獲之夜
夢之曰余爾所嫁婦人之父也爾用先人之治命余以
是報顓之子顓是曰令狐文子景公使為卿曰昔克潞

之役秦來圖敗晉功魏顆以其身却退秦師于輔氏親獲杜回其勲銘於景鐘至於今不忘其子不可不興也

晉呂甥

呂甥姓瑕名飴甥字子金食采於陰秦之獲晉惠公將許之平陰飴甥會秦伯盟于王城秦伯曰晉國和乎對曰不和小人恥失其君而悼喪其親不憚征繕以立圉也曰必報讎寧事戎狄君子愛其君而知其罪不憚征繕以待秦命曰必報德有死無二以此不和秦伯曰國

謂君何對曰小人感謂之不免君子恕以為必歸小人曰我毒秦秦豈歸君君子曰我知罪矣秦必歸君貳而執之服而舍之德莫厚焉刑莫威焉服者懷德貳者畏刑此一役也秦可以霸納而不定廢而不立以德為怨秦不其然秦伯曰是吾心也改館晉侯饋七牢焉

晉介之推

介之推晉隱士也初從文公出亡文公入賞從亡者及功臣大者封邑小者尊爵未至之推推不言祿祿亦不

及推曰獻公之子九人唯君在矣惠懷無親外內棄之
天未絕晉必將有主主晉祀者非君而誰天實開之二
三子以為己力不亦誣乎竊人之財猶謂之盜況貪天
之功以為己力乎下義其罪上賞其姦上下相蒙難與
處矣其母曰盍亦求之以死誰懟對曰尤而效之罪又
甚焉且出怨言不食其食其母曰亦使知之若何對曰
言身之文也身將隱焉用文之是求顯也其母曰能如
是乎與汝偕隱至死不復見推從者憐之乃懸書公門

曰龍欲上天五蛇為輔龍已升雲四蛇各入其宇一蛇獨怨終不見處所文公出見其書曰此介之推也吾方憂王室未圖其功使人召之則亡遂求所在聞其入縣上山中於是文公環縣上山中而封之以為介之推田號曰介山以志吾過且旌善人時從亡賤臣壺叔曰君三行賞賞不及臣臣請罪文公報曰夫導我以仁義防我以德惠此受上賞輔我以行卒以成立此受次賞矢石之難汗馬之勞此復受次賞若以力事我而無補吾

缺者此又次賞三賞之後故且及子晉人聞之皆說
贊曰從亡之士若狐趙之忠烈曰季之舉賢可謂善始
善終者矣子犯濟河而投璧猶有要君之意焉此介推
所以羞與為比也成子家國皆讓宜其興也先軫勇而
有謀殆詩所謂赳赳武夫者也

春秋臣傳卷七

欽定四庫全書叢要卷一千三百六十二

經部

春秋臣傳卷八

宋 王當 撰

僖公

晉卻成子

卻成子名缺晉卿也父芮誅缺耕于冀胥臣舉之以為
下軍大夫晉侯敗狄于箕缺獲白狄子公以一命命缺
為卿復與之冀宣十一年秋會于欒函衆狄服也是行
也諸大夫欲召狄成子曰吾聞之非德莫如勤非勤何

以求人能勤有繼其從之也詩曰文王既勤止文王猶勤況寡德乎初成子求成于衆狄衆狄疾赤狄之役遂服于晉文十四年缺帥師革車八百乘納接菑于邾婁力沛若有餘而納之邾婁人曰接菑晉出也纘且齊出也若以其指則接菑也四纘且也六子以大壓之則未知齊晉孰有之也貴則皆貴矣雖然纘且也長缺曰非吾不能納也義實不爾克也引師而去之君子大其弗克納也宣八年晉胥克有蠱疾卻缺為政秋廢胥克使

趙朔佐下軍文七年卻缺言於趙宣子曰日衛不睦故
取其地今已睦矣可以歸之叛而不討何以示威服而
不柔何以示懷非威非懷何以示德無德何以主盟子
為正卿以主諸侯而不務德將若之何夏書曰九功之
德皆可歌也若吾子之德莫可歌也其誰來之盍使睦
者歌吾子乎

衛甯武子

甯武子名俞衛卿也踐土之盟衛侯出奔元咺奉叔武

入守及晉人復衛侯武子與國人盟于宛濮曰天禍衛國君臣不協以及此憂也今天誘其衷使皆降心以相從也不有居者誰守社稷不有行者誰捍牧圉不協之故用昭乞盟于爾大神以誘天衷自今以往既盟之後行者無保其力居者無懼其罪有渝此盟以相及也明神先君是糾是殛國人聞此盟也而後不貳初晉文公使醫衍酖衛侯俞貨醫使薄其酖不死僖公為之請納玉於王及晉侯皆十穀王許之乃釋衛侯三十一年冬

狄伐衛遷于帝丘卜曰三百年成公夢康叔曰相奪予
享公命祀相武子曰不可鬼神非其族類不歆其祀祀
鄆何事相之不享於此久矣非衛之罪也不可以間成
王周公之命祀請改祀命文公四年武子來聘公與之
燕為賦湛露及彤弓不辭又不答賦使行人私焉對曰
臣以為肄業及之也昔諸侯朝正於王王燕樂之於是
乎賦湛露則天子當陽諸侯用命也諸侯敵王所愾而
獻其功王於是賜之彤弓一彤矢百旅弓矢千以覺報

宴今陪臣來繼舊好君辱貺之其敢干大禮以自取戾

秦子桑

公孫枝字子桑秦大夫也十三年冬晉荐饑使乞糴于秦秦伯謂子桑與諸乎對曰重施而報君將何求重施而不報其民必攜攜而討焉無衆必敗秦於是輸粟于晉自雍及絳相繼命之曰汎舟之役明年冬秦饑使乞糴于晉晉人弗與秦伯伐晉戰于韓原獲晉侯以歸欲殺之子桑曰不可晉未可滅而殺其君祇以成惡且史

佚有言曰無始禍無怙亂無重怒重怒難任陵人不祥
乃許晉平遂歸晉侯是歲晉又饑秦又餽之粟曰吾怨
其君而矜其民且吾聞唐叔之封也箕子曰其後必大
晉其庸可冀乎姑樹德焉以待能者穆公之用百里孟
明子桑之舉也君子謂之能舉善

秦孟明

百里孟明名視秦大夫百里奚之子也秦違蹇叔之言
發師襲鄭晉人與姜戎敗秦師于殽匹馬隻輪無反者

獲百里孟明以歸文嬴為之請於晉侯晉侯舍之及還
秦伯素服郊次嚮師而哭曰孤違蹇叔之言以辱二三
子孤之罪也不替孟明孤之過也大夫何罪且吾不以
一眚掩大德秦大夫及左右皆言於秦伯曰是敗也孟
明之罪也必殺之秦伯曰孤實貪以禍夫子夫子何罪
使復為政文公二年春孟明伐晉以報殽之役二月晉
侯禦之戰于彭衙秦師敗績晉人謂秦拜賜之師秦伯
猶用孟明孟明增修國政重施於民趙成子曰秦師又

至將必辟之懼而增德不可當也詩曰無念爾祖聿修厥德孟明念之矣念德不忘其可敵乎三年秦伯伐晉濟河焚舟取王官及郊晉人不出遂自茅津濟封殽尸而還遂霸西戎用孟明也君子謂秦穆公之為君也舉人之周也與人之壹也孟明之為臣也其不解也能懼思也子桑之忠也其知人也能舉善也詩曰于以采蘩于沼于汙于以用之公侯之事秦伯有焉夙夜匪懈以事一人孟明有焉詒厥孫謀以燕翼子子桑有焉

楚成得臣

字子玉

成得臣字子玉楚令尹若敖之後也事成王晉公子重耳及楚楚子饗之曰公子若反晉國則何以報不穀對曰若以君之靈得反晉國晉楚治兵遇於中原其辟君三舍若不獲命則左執鞭弭右屬橐韃以與君周旋子玉請殺之楚子曰晉公子廣而儉文而有禮其從者肅而寬忠而能力吾聞姬姓唐叔之後其後衰者也其將由晉公子乎天將啓之誰能廢之違天者必有大咎楚

子圍宋明年春晉侯伐衛楚人又救衛楚子入居于申使申叔去穀使子玉去宋曰無從晉師晉侯在外十九年矣而果得晉國險阻艱難備嘗之矣民之情偽盡知之矣天假之年而除其害天之所置其可廢乎子玉使請戰從晉師晉師退三舍楚衆欲止子玉不可復使請戰曰請與君之士戲君馮軾而觀之得臣與寓目焉晉車七百乘韞鞬鞅鞞晉侯登有莘之虛以觀師曰少長有禮其可用也師陳于莘北楚師敗績晉師三日館穀

楚王使謂子玉曰大夫若入其如申息之老何及連穀而死

魯公子遂

公子遂字襄仲慶父之子也曰東門氏文二年如齊納幣禮也凡君即位好舅甥修昏姻娶元妃以奉粢盛孝也孝禮之始也十六年公使襄仲納賂于齊懿公故盟于鄆丘明年如齊拜穀之盟復曰臣聞齊人將食魯之麥以臣觀之將不能齊君之語偷臧文仲有言曰民主

偷必死宣元年書公子遂如齊逆女稱族尊君命三月
遂以夫人婦姜至自齊舍族尊夫人也八年六月如齊
至黃乃復卒已卒于垂是日有事于太廟壬午猶繹萬
入去籥

贊曰胥臣之舉卻缺卻缺之廢胥克庶乎愛而知其惡
憎而知其善者也終之胥臣畜怨禍延三卻故知喜怒
以類者鮮矣管仲奪伯氏得不為賢哉甯武子之守義
執禮何其知也至衛侯之出而能屈身以全君此孔子

所謂其愚不可及也子玉子反之喪師固有餘責然孟
明荀伯之敗而秦晉宥之子玉子反之敗而楚殺之此
霸之所以分也邲穀之敗以君勤遠略而將各有心非
專二子之罪也然非子桑貞子之言亦無以收後效古
之進賢受上賞不亦宜乎楚無二臣之言而加以子反
子重之責祇足以速其死楚真蠻夷哉

春秋臣傳卷八